

欽定大清會典事例

欽定大清會典事例卷一百十二

吏部

處分例

捏造鈔報
嚴禁淫詞

遺漏行文
舉首詩文
嚴禁公師

書札
修

書錯誤
不准率行
僧道度牒
減寫

年號地名
官名人名

捏造鈔報○康熙五十三年議准各省報房在京探聽事件任意捏造言語錄報係官革職該

管官不行查出一次罰俸六月二次罰俸一年

三次降一級調用

後改為任意捏造言語錄報
係官革職投問該管地方官

不行查禁
一年五城監察御史及五城司坊官大宛

二縣不時稽察儻有前項違禁之徒從重治罪

該管官不行查出後經發覺照例議處在京大臣貴近亦須戒飭家人子弟不得濫交匪類儻有前項事發將濫交匪類之家人子弟並不行約束之家主一併照例議處治罪○又議准姦棍等匿名揭帖妄行詐害不係兩造對理布散部院衙門投送者概不准行出首送揭之人緝拏移送刑部照例治罪不行拏送降四級調用若接受具題審理者將接受具題審理官革職若不肖之官唆使劣棍黏貼揭帖或令布散投送亦照黏貼布散揭帖之人例治罪其匿名揭

帖不係兩造對理揭帖布散黏貼之人該管地方官不行嚴加訪拏發覺將司坊官罰俸一年巡城御史罰俸半年○雍正元年議准在京書吏提塘人等串通圖利詛造無影小鈔藉端嚇詐交與五城巡城給事中御史司坊官順天府大宛二縣不時嚴行訪拏若不行嚴拏事發該巡城給事中御史各罰俸一年司坊兩縣官員各降二級調用○乾隆十八年

諭前經降旨各省督撫將傳鈔偽稿人犯無論已未發覺俱加恩免究釋放雖未嘗區別官民言之但傳鈔

一事。在愚民無知。固有應得之罪。而首犯既伏厥辜。尚不妨曲為寬宥。若職官既列縉紳。見此大逆不道之詞。當無不髮指痛恨。且其真偽原屬了然。豈有通仕籍閱鈔報而不知此偽為者。是其罪實不得與愚蒙無識者等。正不可因有此旨。概置勿問也。今據江蘇巡撫莊有恭奏山陽縣知縣韓壩。湖南巡撫范時綬奏提塘武進士蕭引鵬。均於得稿之後。不據實首稟。輒轉傳聞。各請革職治罪。是各督撫原知職官之不與平民等也。韓壩蕭引鵬俱革職。照該撫等所擬治罪。並傳諭各省督撫。自奉前旨以後。傳鈔各犯。除

平民免究外。其已經究出到案之文員交吏部。武員交兵部。仍行照例定擬。彙齊歸結。不必逐案具題。至於未經發覺者。俱從寬免究。用昭肆眚。包荒至意。○

道光十六年

諭近日外間傳聞私鈔多有未經發鈔之件。如本日某衙門直日召見某人。科道某遞封奏一件。此等探事惡習。本干例禁。朝廷政事具有體制。其由內閣鈔出各件。例得宣示。朕綜理庶政。無事不可布告臣民。至事關嚴密。本非外間所得與聞。豈容任意訛傳。概行宣播。且刊刻私鈔。纖悉畢登。不但洩漏滋弊。甚非所

以崇政體而昭嚴肅。嗣後著御前大臣飭令奏事處直班章京等嚴行查禁。毋許再有訛傳私鈔。以昭慎密。儻查禁不力。仍蹈前弊。惟該大臣等是問。經此次飭禁後。如再有私行刊刻者。著步軍統領衙門嚴拏究辦。毋得視為具文。○咸豐三年

諭軍機大臣面奏。查出刊刻報本。內有未經發鈔摺件。並將原摺及報本呈覽。朝廷政事。具有體制。凡內外臣工陳奏各件。其由內閣鈔出者。例得宣示中外。至未經發鈔之件。豈容任意傳播。前據巡視五城御史鳳寶等奏。都城軍備一摺。軍機處並未發鈔。何以外

間遽行刊刻。且字句間多有增減不符之處。其由何人私自傳鈔。必應嚴行查究。著內閣查明具奏。並著巡視五城御史明白回奏。○又

諭步軍統領衙門。奏拏獲刊刻並未發鈔奏章人犯。請交部審辦。一摺。羅祥、張義興、王得均、王繼遠均著交刑部審訊。所刊奏摺既據羅祥等供係吳廷溥交給刊刻。而鳳寶等回奏摺內並未據實指名係何人發交。已屬有心含混。且以報房前次漏刻諭旨等詞牽砌入奏。尤為意存飾辯。給事中吳廷溥於並未發鈔摺件。輒即擅行刊刻。實屬任意妄為。著先行交部嚴

加議處給事中鳳寶陳枚玉山聯福御史彭慶鍾隆慶蔡徵藩孫鳴珂志文於回奏時聲敘模糊顯有瞻徇情弊均著先行交部議處○四年

諭本日據軍機大臣面奏章京吳台朗於昨日向恭親王奕訢等稟稱章京程恭壽將柏後審辦夥買木植案內違謹等供單私令供事鈔錄送與慶錫家人當將該員等傳齊質問委無確據提訊該班供事僉稱程恭壽並未令伊等另行鈔錄再三究詰吳台朗亦自認懷疑願甘息事復據程恭壽呈出自行鈔錄載齡等所奏沈祖望遺筆一紙而於此次鈔錄供單堅

不承認吳台朗意存攻訐。迨查無確據。輒敢起滅自由。謬妄已極。程恭壽於此案犯供。雖查無私鈔實據。其呈出之件。亦係欽差查辦要案。豈應鈔錄傳播。其平日不知慎密。已屬可見。光祿寺少卿程恭壽。禮部郎中吳台朗。均著即行革職。

遺漏行文。○同治二年

諭吏部對調知縣。向係文選司移付考功司。查明有無事故。分別准駁。此案戴錫福開復頂戴。係奉旨發鈔之件。該司員漏未行文。亦未移付註冊。及上年十二月間。文選司移付考功司查問。戴錫福有無事故。該

司員復不查明率以戴錫福尚未開復處分付覆實
非尋常疏忽可比所有經手遺漏之司員著查取職
名交都察院嚴加議處各該部院衙門分設各司以
專責成遇有應行知會之處理宜確切查明隨時知
照乃近來該司員等因循疲玩相習成風於應辦事
件漫不經心毫無稽覈以致書吏夤緣為姦藉滋蒙
混需索苟有不遂雖以明奉諭旨之件輒敢任意藏
匿迨公事辦理兩歧始藉口遺漏以巧自掩飾殊堪
痛恨嗣後各部院堂官務須督飭司員振刷精神力
除積習稽察書吏嚴定章程儻仍有遇事延閣諸弊

即將經手司員嚴叅並將承辦書吏嚴懲不貸以清積弊

嚴禁訟師○雍正三年奏准凡寫呈詞之人止令寫錄實情控告若教唆詞訟增減情罪誣告並駕詞越告以致傷財害俗者令地方官嚴拏照律例從重治罪若地方官失於覺察該督撫訪聞題叅將不報之地方官照生監包攬錢糧該管官不行查出例罰俸一年若明知訟師誘惑愚民教唆誣捏等事仍復徇畏不報經上司訪拏將該地方官照姦棍不行查拏例降一級

調用。○乾隆元年議准。嗣後如有訟師為害擾
民。該地方官不能查拏禁緝者。如止係失於覺
察。仍照定例議處。若明知訟師誘惑愚民教唆
誣捏等事。仍復徇畏不報。經上司訪拏。將該地
方官照姦棍不行查拏例降一級調用。○嘉慶

十七年

諭州縣為親民之官。詞訟原應速為審理。以免拖累。經
朕時常降旨訓飭。而外省因循疲玩。積習相沿。置若
罔聞。或性耽逸安。怠於聽斷。或豫防翻案。冀免干連。
以致訟師逞其伎倆。顛倒是非。往往起衅甚微。久且

釀成巨案而上控京控呈詞亦日漸增多皆不肖州
縣官養成刁風而督撫多徇情袒護吏治民習日壞
一曰實深痛恨督撫有整飭地方之責著各嚴飭所
屬州縣盡心民事以聽訟之勤情斷獄之遲速分別
勸懲庶吏治修明案牘漸稀民風日臻淳樸至緝捕
要犯定例分別初二三四參處分以次加嚴原使承
緝官自顧考成不敢任意疏縱乃近來州縣官任內
有緝拏要犯之案四參屆限往往設法通融委署他
缺將處分移於接緝之員遂至捕務廢弛姦徒漏網
嗣後各督撫於所屬州縣官如有承緝要犯四參限

滿者即按例題參降調離任毋得取巧瞻徇通融規避以嚴定制而肅官方○二十年

論

御史孫升長奏嚴拏訟師以做刁風一摺所奏是獄訟之繁多由訟師從中構釁播弄愚民挖累良善並或勾通胥吏把持官府種種鬼蜮伎倆為害滋甚如該御史所奏來京上控各呈詞字迹語句如出一手是其明證朕聞都察院衙門附近即有山東訟棍窩留其間包攬詞訟城外各會館廟宇中亦有藏匿者著步軍統領衙門順天府五城一體密訪嚴拏獲犯即交刑部嚴審重懲外省地方官亦著嚴行查禁以

清訟源而正民俗○道光五年

諭訟師包攬詞訟案件多方挑唆以致一案化為數案小案變成大案者更為可惡除訪拏懲治外凡案件審係虛誣者必追究主唆之人從嚴訊究至京城輦轂之下尤應肅清前三門內外如有姦棍訟師包攬京控之事著步軍統領順天府五城一體嚴拏務獲從重辦理○三十年四月

諭著通諭各省督撫學政及在京步軍統領衙門順天府五城各飭所屬認真訪緝查有刁衿蠹胥訟師棍棍每犯必懲嚴拏究辦以端風化而靖地方

嚴禁淫詞 ○乾隆三年議准凡坊肆內一應小說淫詞嚴行禁絕將板與書一併盡行銷毀如有違禁造作刻印者係官革職買者係官罰俸一年若該管官員不行查出一次者罰俸六

月二次者罰俸一年三次者降一級調用仍不

准藉端出首訛詐

後改為該管官不行查出每次罰俸六月明知故縱者降

二級調用

○三十年奏准凡坊肆所刻驚天雷相角

法家新書刑臺秦鏡及一切構訟之書應盡行查禁銷毀不許售賣如有仍行撰造刻印該管官不行查出者照禁止淫詞小說例每次罰俸

六月○道光十四年

諭御史俞焜奏請申明例禁以培風俗一摺自來民俗之淳漓由於平待之漸染國家型方訓俗必將孝弟忠信禮義廉恥大為之防方可正人心而維風俗如該御史所奏近來傳奇演義等書踵事翻新詞多俚鄙其始不過市井之徒樂於觀覽甚至兒童婦女莫不飮聞而習見之以蕩佚為風流以強梁為雄傑以佻薄為能事以穢褻為常談復有假託誣妄創為符咒禳厭等術蠢愚無識易於簧鼓刑訟之日繁姦盜之日熾未必不由於此嗣後著各直省督撫及府尹

等嚴飭地方官實力稽查如有坊肆刊刻及租賃各鋪一切淫書小說務須撙取書板盡行銷毀庶幾經正民興奇哀胥靖朕實有厚望焉○同治十年

諭御史劉瑞祺奏請飭銷毀小說書板一摺坊本小說例禁甚嚴近來各省書肆竟敢違禁刊刻公然售賣於風俗人心殊有關繫亟應嚴行查禁著各直省督撫府尹飭屬查明應禁各書嚴切曉示將書板全行收毀不准再行編造刊印亦不得任聽吏胥藉端撙查致涉騷擾

舉首詩文書札○乾隆三十年奏准凡有舉首

詩文書札悖逆譏刺者。務令承審各官細心推詳。若止是詩文書札中字句一時失檢。涉於疑似。並無確實形迹者。將舉首之人依律治罪。若承審各官不行詳察。輒波累株連成獄。將承審官照故入人罪律治罪。○四十三年

諭。據李湖奏。臨湘縣民婦黎李氏呈控。監生李大本私刻資孝集。語多僭越。又查出所作得失圖。刊載墳山圖形碑記。現飭提齊有名各犯。親押赴省。徹底根究。從重定擬等語。並將圖集進呈。朕詳加披閱。資孝集中衆人所作詩文。將伊母比之姬姜太妣文母。皆係

迂謬不通之文。妄行用古。與今年巴延三所奏舉人
王爾揚代人作墓碑。率用皇考字樣者。彷彿相似。並
非狂悖不法。如王錫侯之顯肆悖逆者可比。本可毋
庸深究。尤不宜概行提問。株累多人。但須訊明李大
本平日武斷滋事各款。如果屬實。亦止須照現辦劉
翱之案。問擬外遣。已足蔽辜。所有該犯親屬及集內
有名之人。俱不必提究。仍將朕旨出示宣諭。俾衆各
曉。且令庸陋無識之徒。此後行文。各知檢點。毋再故
犯干咎。○四十四年

諭。據李湖奏。武陵縣生員鄧大廷呈繳前任湖廣提督

俞益謨刊刻青銅自考一書請銷毀查辦一摺閱其書係俞益謨將伊歷任奏疏及文移書啟彙集而成並無違礙即該撫籤出處所亦止擡頭款式未合及字句偶失檢點此等乃常有之事不足深責况俞益謨本係武弁原不能通曉文義其所刻書籍大抵皆庸幕及字識輩纂輯成帙又豈能諳習體例且刻出距今七十餘年其人物故已久何必復行追究乎但原書既經繳出自應銷毀亦不必輟轉深求致滋紛擾著傳諭李湖不必查辦○嘉慶四年

諭向來大逆緣坐人犯按律辦理原以其實犯叛逆自

應申明憲典。用示懲創。至比照大逆緣坐人犯。則與實犯者不同。即如從前徐述夔。王錫侯。皆因其著作狂悖。將家屬子孫。遂比照大逆緣坐。定擬殊。不知文字詩句。原可意為軒輊。況此等人犯。生長本朝。自其祖父高曾。仰沐深仁厚澤。已百數十年。豈復繫懷勝國。而挾仇抵隙者。遂不免藉詞挾制。指摘疵瑕。是偶以筆墨之不檢。至與叛逆同科。開告訐之端。復失情法之當。著交刑部。除實犯大逆。應行緣坐人犯。毋庸查辦外。凡比照大逆人犯。其家屬子孫。或已經發遣。或尚禁囹圄。即詳細查明。註寫案由。開單具奏。候朕

覈奪降旨○又

諭據顏檢參奏原任工部主事魏若虛因進京乏費囑託顏檢出差通查牙行以便各差役資送盤費等語並將催辦原札進呈魏若虛以差查擾累之事干請本省藩司希圖從中獲利顏檢拒其所請復敢以私書催促實屬卑鄙不堪魏若虛著革職交張誠基秉公審訊○道光八年

諭阮元等奏查出謀刻石篆並寫造逆詞之匪犯分別緝拏審明辦理一摺此案在逃之趙應隴在越南小湖地方起意謀為不軌商同李映川編寫逆詞至開

化糾約希圖滋事。並王士林偽雕石璽圖往越南小湖誑惑滋事。經生員李宗唐首報。該督等派委文武各員弁將相連兩起匪犯訪拏迅獲。併案審明定擬。所辦甚好。除李映川等犯業經於審明後恭請王命分別凌遲斬決。梟示外。餘著刑部速議具奏。生員李宗唐舉首可嘉。著加恩賞給舉人。准其一體會試。至王士林先後在滇黔犯事。現在首夥各要犯皆經拏獲。僅逸餘犯二三名。覈其功過。尚足相抵所有滇黔二省失察各地方官。俱著免其議處。其未獲首逆趙應龍。是否匿迹越南。抑係潛逃內地。著該督等勒限

嚴飭各屬文武員弁認真訪緝。嚴拏務獲。並在逃各犯。及此外有無轉糾逆犯一體實力拏獲究辦。如限滿無獲。即著照例叅處。○同治五年

諭張開霽以湖北候補道員獻詩本省長官內夾書函語多要挾。及官文欲自行檢舉。咨明巡撫查辦。該員復浼人央求免其查辦。實屬不安本分。張開霽一員著該督撫隨時留心察看。如實有劣迹。即著逐令回籍。不准在湖北招搖生事。以肅官常。

修書錯誤 ○乾隆五十一年

諭四庫館進呈八旗通志一書朕詳加披閱其志烈傳

提要內詳載開國以來

列祖

列宗褒獎功勳風勵忠節之典而於乾隆年間恩卹諸大政俱闕而不載如八旗陣亡官員世職襲次已完朕特加恩旨賞給恩騎尉世襲罔替而綠營官員陣亡議卹之例止得難廕一次非奉特旨加恩不能得有世職。昨年降旨凡陣亡人員無論漢人及旗人之用於綠營者總與旗人一體給予世職即襲次已完亦照例給恩騎尉俾得賞延於世蓋以官員等力戰敵愾效命疆場其義烈實堪嘉尚是以特沛殊恩使

其子孫永承恩澤懋答前勳甚盛典也乃通志內竟未登載則將來此書之傳何足以羽翼國史昭示來茲再志內所載壯尼大即護軍校他如昂邦章京阿思哈尼哈番之為子男阿達哈哈番之為輕車都尉拜他拉布拉哈番之為騎都尉挖沙拉哈番之為雲騎尉雖不便擅改原文亦當加按註明或請朕指示使後人開卷瞭然方為傳信豈多人無一思及此但知遷延其事以為領卓飯之計乎是鈔史非修史矣前因遼金元三史人地名原文俱係當時國語而後之修史者不諳文義率以不善語言為之譯寫是以

數年來特命館臣按照各史不改其事。但將語言詳加改正。鈔板重修。遂使當時名爵山川瞭如指掌。今以本朝之書。乃仍按原文開載。不為分析。注明開列。凡例以定章程。是為前史盡心改正。而於本朝反不經意。不幾貽笑將來。傳疑後世。辦理太屬疏漏。此書著交軍機大臣會同該館總裁。重加輯訂。詳細添註。加按進呈。候駁閱定後。再將文淵等閣陳設之書一體改正。所有承辦此書之總裁及纂修等。俱著逐一查明。交部議處。○嘉慶五年。奏准各館修書纂修官文理錯誤者。罰俸三月。總裁罰俸一月。校對官

不能對出錯字。校刊官板片筆畫錯誤不能查
出者亦罰俸一月。○十年

論昨據會典館呈進事例內有禮部冠服一本。擡頭處
於

世宗廟號上一字寫作聖字。當經籤出。令總裁官自行
議罪。並將纂修校對等官一併議罪。本日保甯等自
請革職。並請將纂修汪德鉞等革職。交刑部治罪等
語。朕於各館呈進書函及各部院一切奏摺本章內
有關繫

天

祖典禮必先盥沐啟函即尋常事件恭遇

列祖

列宗廟號自係大經大法所在捧繹之餘敬畏嚴恭實出於不自知是以寫目倍加詳慎此內設有繕寫錯誤字樣一經看出若不指明查處不惟朕心有所不敢亦且有所不忍從前屢有錯誤節經降旨通諭飭令一體敬謹詳閱免蹈愆尤今進呈會典事例於擡頭字樣復有訛寫可見諸事漫不經心實非尋常錯誤可比若照伊等自請處分將大學士尚書八人概行罷斥朕固不為已甚然大臣等設豫存此見以為

即有錯誤總可冀幸寬免則此心即屬不敬遇事必
多舛錯况進呈事件鉅細總當留意若云伊等所管
事務較多無暇詳閱則朕躬攬萬幾又何以事事必
親披覽乎此次書寫擡頭錯誤既經朕指出各總裁
等安能辭咎保甯慶桂董誥朱珪劉權之德瑛戴衢
亨長麟均著加恩改為革職留任八大臣中實心任
事者必知悛改因循保位者亦不過視為泛常或謂
朕過於苛細亦未可知自問於心能無愧乎朕於諸
大臣恩意有加現因書籍錯誤大學士尚書等八人
同時概予以革職留任朕心已為之不憚諸大臣等

尤當仰體此心時懷敬謹用副成全亦不但呈進書籍為然也至總纂汪德鈺協修楊樹基校對邊廷英均係專辦書籍之員其咎更無可逭均著革職從寬免其交部治罪嗣後該總裁等務須各思愧奮於進呈書籍倍當小心詳閱所有該館進書章程著保甯等另行妥議具奏總在辦理詳慎期於無誤不可欲速誇多致涉草率○十一年

諭前禮部進呈新修則例內皇子謁

陵典禮所載袍服及儀注有錯誤之處特令詳查更正本日經禮部修改進呈朕覆加披閱內載皇子至下

馬牌降輿馬字樣。皇子從無坐轎之事。况謁

陵乎。此又係率意混寫。即降字亦非皇子所應用。則例內應將降輿字面刪去。改為至下馬牌處下馬。以昭國家大體。又註內琉璃門訛寫瑤琉門。該部堂司官於遵旨改換書頁字數無多。竟不細心校勘。不知每日所看何書。所辦何事。太覺疏忽。不以公事為重矣。禮部堂官著傳旨申飭。並交部察議。承辦司員著交部議處。○十七年

諭據武英殿御書處奏校刻

皇考高宗純皇帝聖訓告成裝函呈覽。朕詳細敬閱內

字畫訛誤處甚多而訛誤最重者第二百四十四卷內

世宗憲皇帝廟號第十卷第三十一卷板心內

高宗純皇帝廟號各訛寫一字並未詳校刊正大失敬謹之義校書如埽落葉魯魚亥豕豈能無一字之訛然在尋常書籍過尚可原至若

實錄

聖訓關繫

祖

宗謨烈所存冊府尊藏用垂久遠校勘應倍加小心况

卷內恭書

廟號之處更當如何敬謹朕每晨恭讀

實錄凡卷頁內前後書寫

廟號

徽稱必皆字字恭閱如承

昭鑒近年來館臣及部院衙門有訛寫

廟號者並曾降旨嚴懲且諄諄訓誡大小臣工自當共

知儆惕乃此次仍復漠不經心怠忽舛錯若律以大

不敬之條大小臣工實不能當此重咎此次格外從

輕懲治以昭炯戒所有承校此三卷刻本之校對官

大理寺評事曹江內閣中書顧英工部員外郎彭鳳儀俱著革職發往烏魯木齊效力贖罪過六年後方准提奏候旨施行提調官編修陳鴻墀在館多年兼辦校勘著革職提調侍講姚元之到館未久著降為編修仍罰俸二年總裁英和陳希曾二員係翰林出身校書悉所優為乃不加敬慎厥咎較重亦應革職姑念素行勤勞著實降三級調用英和仍留南書房行走管理三山事務儀親王大學士慶桂二人係總理大臣因年老不能照料周到著退去管理武英殿御書處差使儀親王仍罰職任俸三年慶桂仍罰俸

三年至其餘訛錯各處內有盱眙二字訛寫日字偏旁查係原本錯誤以致刊校相沿此等處本無甚關繫若係尋常書籍即可免議惟係

聖訓內字畫不能邀免所有原充

實錄館各總裁內除慶桂英和二人業已分別處分德瑛劉鳳誥久經休致革職外董誥曹振鏞均著交部察議此外承校錯誤應議各員一併交部察議○又

諭嗣後

實錄

聖訓內有字畫訛誤之處其罰俸處分俱毋庸議○

十九年奏准各館書成奏請議敘令總裁按其功課分別一二三等造冊咨送吏部辦理概不准復用超等字樣違者降一級調用○又

諭國史館纂辦臣工列傳向不按年分先後以次進呈其辦理章程本不畫一前日該館進呈和珅列傳和珅逮問伏法迄今已越十五年始將列傳纂進已太覺遲緩迨詳加披閱其自乾隆三十四年襲官以至嘉慶四年禡職三十年間但將官階履歷挨次編輯篇幅寥寥至伊一生事實全未查載惟將逮問以後各諭旨詳加敘述是何居心不可問矣和珅在乾隆

年間由侍衛游擢大學士。晉封公爵。精明敏捷。原有微勞足錄。是以

皇考高宗純皇帝加以厚恩。奈伊貪鄙性成。怙勢營私。狂妄專擅。積有罪愆。朕親政時。是以加以重罰。似此敘載簡略。現距懲辦和珅之時。年分未遠。其罪案昭然在人耳目。若傳至數百年後。但據本傳所載。考厥生平。則功罪不明。何以辨賢姦而昭賞罰。國史為信。今傳後之書。事關彰瘴。不可不明白宣示。所有承辦和珅列傳之纂修官。著查明參奏。交部嚴加議處。其正副各總裁。校勘疏漏。均難辭咎。除陳希曾甫經到

京仍留原館毋庸交議外。董誥在館年久。精神未能周到。著毋庸兼充正總裁。仍交部議處。景安現已年老。章煦甫經到館。均免議處。毋庸兼充副總裁。著派曹振鏞。托津。潘世恩。充國史館正總裁。盧蔭溥。充國史館副總裁。將該館纂輯各事宜。妥立章程。加意整飭。其和珅列傳。著另行詳查。編次進呈。欽此。遵

旨議奏。刪纂和珅列傳之編修。席煜請革職。審訊。奉諭。顧莼原纂和珅列傳稿本內。本載有事實四條。皆和珅罪狀。仰奉

皇考高宗純皇帝飭諭。加以譴責者。葛方晉節去三條。

席煜節去一條其居心實不可問除葛方晉業經身故外席煜前已革職著即行押解回籍交江蘇巡撫張師誠嚴行管束令其閉門思過不准外出並留心稽察如有怨望詩文即奏聞將該革員拏問治罪○

二十四年

諭朕前命纂輯石渠寶笈續編以南書房翰林英和黃鉞姚文田三人董其事復於翰林中選派吳其彥等八人隨同編緝書成時英和自請捐貲繕錄陳設本十分並因伊所管事務較繁奏明不能自行校對仍責成吳其彥等八人分冊詳校各於卷後註明何人

恭校以免推諉嗣於裝潢進呈後將乙部一分陳設御園以備披覽朕於幾餘不時檢閱藉以遣暇此內吳其彥張鱗吳信中所校各冊訛誤尚少其餘字畫脫落偏旁錯誤經朕逐條籤出者每冊多有惟龍汝言所校已積至百餘處均發交南書房隨時更正從未加以譴責昨閱至第二十五函第一冊內恭載

高宗純皇帝廟號帝字脫落非尋常錯誤可比不可不加以懲處英和雖未能自校亦難辭咎著罰尚書俸三年龍汝言精神不周辦事粗疏毋庸交部議處著即革職回籍○二十五年議准

武英殿修改誤字一千字。限二十日。○道光三年
諭慶祥奏新疆識略校有誤刻字樣。請飭更正一摺。欽
定新疆識略書成前經頒賞該將軍。輒揀派廢員陳
孝寬照繕。籤出各處誤刻字樣。將原本粘籤進呈萬
里之外。馳遞已頒圖書二函。已覺可駭。及至折閱摺
奏。無非吹毛求疵。點畫訛誤。並無關於切要。曷勝憤
悶。慶祥受

皇考特達之知。畀以重任。雖日孜孜。撫綏二萬里之
邊陲。猶恐智不周而力不逮。不料伊反盡心校對文
字。太不知輕重也。慶祥著傳旨申飭。其遞到新疆識

略經朕籤駁多處仍著發還

僧道度牒○乾隆四年奏准僧尼道士凡有事故將原領牒照追繳毋許改名更替但恐地方官漫無覺察以致不肖僧道將已故之牒照暗行隱匿將現在之牒照私相授受應責成地方官不時稽察其應繳牒照年終彙繳不得遺漏如有隱匿影射情弊地方官不行查出照失察例罰俸三月僧道勒令還俗僧道必年逾四十方准招受生徒一人如年未四十即行招受及招受不止一人地方官不行查明照失察例罰

俸三月所招生徒勒令還俗○又奏准各省地方官遇有真人府法官傳徒散帖之事不行拏究及混行詳請各部者府州縣官罰俸一年督撫司道罰俸六月至嗣教真人如有差委法官前往各省開單傳度之處各部請示禮部堂司官混行者准者將該司官罰俸一年堂官罰俸六月○三十九年

諭僧道度牒本屬無關緊要而查輯適以滋擾所有禮部奏請給發度牒之處永遠停止○四十一年覆准選充僧綱道紀令地方官選擇實在焚修戒法

嚴明者取結咨補遇僧道官犯事即將原結送
之地方官照不行查明給結例罰俸一年○又
議准各省地方官遇有真人府法官在彼開壇
度牒等事不行查禁將州縣官罰俸一年府州
罰俸六月道員罰俸三月○嘉慶二十年

諭刑部連日研訊王樹勳一犯據供前在廣慧寺為僧
時開堂說法曾有官員及舉人生員等數人皈依受
戒現任倉場侍郎蔣予蒲亦在受戒之列等語該犯
假說佛法聳惑聽聞從前破案時辨理輕縱茲經供
指確鑿不可不加以懲處蔣予蒲爾時已為內閣侍

讀學士係四品京堂官。乃惑於異說。受彼五戒。實屬有玷官箴。無顏出仕。蔣予蒲著。即革職。此外被惑之人。除已故者。毋庸置議外。其餘俱應斥革。著刑部查明參辦。其王樹勳供詞。審訊明確。著即按律定擬具奏。欽此遵。

旨議奏。請將王樹勳發往黑龍江充當苦差。奉

旨。先在刑部枷號兩箇月。再行發遣。○又

諭張師誠奏。遵旨傳詢宋鎔。據稱前在京候補道員時。曾至廣慧寺與僧人明心相識。並無受戒情事。後在蕪湖道任內。伊來募化。給過銀五十兩。嘉慶十七年。

有知府王樹勳進京來謁詢知即係明心還俗捐官等語宋鎔前與僧人明心往來並無受戒情事尚不至干吏議迨後王樹勳來謁時伊身任卿貳且刑部職司法紀如係僧人蒙捐職官即應叅奏况曾經犯案枷杖尤為有玷名器乃匿不舉發實屬有心徇隱宋鎔著交部嚴加議處○又

諭馬慧裕等遵旨明白回奏並自請處分一摺王樹勳以犯案僧人改名蒙捐職官洵升知府在楚省多年馬慧裕等既風聞該犯從前有為僧之說並聞人呼為妖道且察其才具不勝方面之任早應據實叅奏

乃因循遷就殊乖實心任事之義。馬慧裕、張映漢俱著交部議處。○道光三十年七月。

諭此案薛執中以道士屢次改名易裝，藉醫招搖行迹詭秘，到處煽惑人心。所寫書信擅議時政，妄談休咎，情詞尤為狂悖。即立正典刑，亦屬罪無可逭。惟念朕御極之初，法外施仁，稍從末減。薛執中著從寬定為斬監候。秋後處決。仍著刑部隨時查察。如該犯在監復有不法情事，即行奏明正法。

年號地名官名人，不准率行減寫。○光緒十

三年

諭內外臣工章疏聲敘各省地名及臣下銜名等類均應全寫。湖查乾隆嘉慶道光年間疊次欽奉

諭旨

訓飭不准率行減省允宜永遠恪遵乃近來奏疏

往往任意減寫如科布多僅稱為科塔爾巴哈臺僅稱為塔吉林黑龍江熱河僅稱吉江熱之類不勝枚舉至烏魯木齊烏里雅蘇臺均稱為烏更屬漫無區別又如司道但稱某司某道府縣但稱某守某令殊失君前臣名之義本朝年號尤應敬謹全書如乾嘉道咸字樣私家著述偶有省文豈可登諸奏牘嗣後內外各衙門陳奏事件於年號地

名人名等項務當全行書寫不准減文致乖體制

欽定大清會典事例卷一百十三

吏部

處分例 服飾違例

服飾違例○康熙十一年議准。凡違例越分僭用服色者。係官革職。其違禁之物入官。如該管官不行稽察。被旁人獲首到官。審實。將違禁之物給予獲首之人。其族長係官罰俸三月。若家下奴僕違禁者。奴僕之主。係官罰俸三月。其五城司坊官失察者。每次罰俸三月。該城滿漢御史失察者。每事犯二次。罰俸三月。直隸各省軍

民違禁。該督撫失察三次。罰俸三月。司道失察
二次。罰俸三月。府州縣官。每次罰俸三月。○雍
正五年議准。凡屬員謁見上司。遇公服之日。止
用補服。不許擅用朝衣。違者皆照錯誤禮節例
議處。○七年

論。百官章服。皆有一定之制。所以辨等威。昭品秩也。向
來屢申禁約。不許逾分濫用。以開僭越之端。定例昭
然。各宜遵奉。聞近來服色頂戴。及坐褥頂馬繫纓之
屬。又有不按定例。任意僭越者。御史有稽察部院之
責。而各御史中。即有參差不齊之處。是己身先有逾

分違例之咎。又何以彈劾他人。嗣後紫禁城內著三
旗侍衛稽察。大城內著步軍統領稽察。外城著五城
御史稽察。儻有違例僭越之人。而侍衛統領御史不
行叅奏。別經發覺者。將稽察之員。一併處分。○八年
諭。大小官帽頂補服坐褥等項。各宜遵照現任品級。不
得僭越。從前已降諭旨。後因御史等查奏文武官員。
內有補服與頂戴不相符者。朕又降旨。頂戴等項。各
按本分品級。不得計算加級。所頒諭旨甚明。近聞文
武官員。仍有越制擅用者。該管官查問時。則引從前
准算加級之例。掩飾支吾。甚屬不合。嗣後內外文武

大小官員。頂戴補服坐褥。悉照本身現在品級。不得指稱加級。以開僭越之端。在京著有稽察之責者。嚴行稽察。在外著該管上司稽察。儻仍復不遵。除將本人議處外。其失察之員。亦一併處分。○乾隆二年議

准。各省官民服飾。自定制之後。凡有違者。王公由宗人府稽察。叅處。文武大臣。由吏部兵部稽察。叅處。各衙門官員。由該管官查叅。按其情罪輕重。分別處分。違式之物入官。○四年覆准。官

員違例。錯用帽頂補服坐褥者。

尋增為錯用帽頂補服坐褥頂

馬等項。無傳越情事者。

皆罰俸六月。○五年奏准。京官禮

更換。違者立即叅奏示懲。至外間民人涼暖帽上俱用紅絨大結。尤屬非是。並著一體飭查。嚴行禁止。俾冠服各有等差。官聯益昭整肅。其游手棍徒及逃匪等。有假充職官。戴用金頂者。亦照該給事中所奏。實力嚴拏。毋任宵小弊混。○七年

諭。番役專司緝捕盜犯。原與隸卒無異。凡各衙門皂役人等。例不准其為官。其子孫亦不准應試。則番役自應比照此例。以昭畫一。乃從前步軍統領。往往因番役拏獲要犯。輒奏請賞給頂戴。如番子頭目馬凱。即游賞守備職銜。且番役子孫。並有應試出仕者。殊不

足以別流品而重名器。嗣後步軍統領衙門。遇有番役緝捕勤奮。止准量加獎賞。即實有拏獲要犯者。亦止可從優加賞。毋許給予頂戴。儻再行濫請。即以違制論。○又

諭。朝會大典。一切服色。豈容僭越。昨日派出喜起舞之三等侍衛世泰。向伊戚鄭親王烏爾恭阿借用帶版。烏爾恭阿不應。即將親王朝帶版借給。而世泰亦不當。執行僭用。均屬非是。烏爾恭阿著交宗人府嚴加議處。世泰著交頂侍衛內大臣嚴加議處。○又

諭。從前行營扈從之都統副都統等所穿馬褂。均係各

按旗色。原為所屬人等易於辨識。今該員等多不按旗穿用。有失舊制。嗣後凡遇隨圍。除都統毋庸按旗穿用外。其未賞穿黃馬褂之副都統等。俱照舊制穿用。著為令。○八年。

諭。御史花良阿奏。外省知縣。身膺民社。時有祭祀典儀。請仿照贊禮郎加銜之例。准戴六品銜頂。挂用朝珠等語。所奏殊屬不通。向來恭遇

壇

廟大祀。朕親詣行禮。贊禮郎等官。因在朕前執事。是以准換六品銜頂。挂用朝珠。並賞穿貂褂。以崇體制。至

外省知縣。雖有承祭禮儀。止係尋常祀典。獲與執事。何得援引比例。輒請一體換用銜頂朝珠。變更舊例乎。原摺著擲還。○十一年

諭。近來八旗子弟。往往沾染漢人習氣。於清語騎射。不肯專心練習。拋荒正業。甚至私去帽頂。在外游蕩。潛赴茶園戲館。飲酒滋事。實為惡習。嗣後八旗官員等。如有不戴頂帽。在外游蕩者。是既不以職官自待。又與平人何異。該管地方官員。即當查拏究治。以示懲誠。○又

諭。前因佟關保兄弟。以現任職官。私去帽頂。在城外飲

酒滋事。當經從嚴懲辦。並明降諭旨。令旗員子弟等。務各謹慎自愛。以飭官方。乃甫閱數月。復有倫布在外揪扭。並不戴用頂帽之事。積習相沿。殊為可惡。若不明示例禁。仍恐不肖之徒。不自檢束。必有復蹈故轍者。嗣後現任文武大員。以及職官。如有私去頂戴。出外行走之事。是已不以職官自居。一經查明參奏。即著降調示懲。儻復另有游蕩滋事情節。著先行革職。再候究辦。即宗室王公。不自檢束。竟有私行游蕩之事。亦照此例辦理。自此次訓諭之後。各宜顧惜名器。慎毋自取侮辱。以副朕教誨諄諄至意。○又

諭。近日有藍翎侍衛倫布。與筆帖式慶雲。在街闖毆一案。因倫布並未戴翎頂。所以將倫布革職示懲。並特降諭旨訓飭文武官員。嗣後僅有不戴翎頂閒行者。一經查出。即著降調。如另有游蕩滋事等情。著即革職。再行審辦。今倫布及從前在城門官廳咆哮之佟關保弟兄。皆係黏杆處侍衛藍翎侍衛整儀尉。可見該領侍衛內大臣。鑾儀衛大臣。及黏杆處大臣。顯係平日於該管之侍衛章京。並不留心約束教導。雖經如此降旨訓誡。該管大臣等。不過將此旨閱看後。傳令曉諭各侍衛章京等而已。而各侍衛章京等。或竟

有不得聞見者。著交領侍衛內大臣。鑾儀衛大臣。黏杆處大臣等。務將該管侍衛章京等傳齊。著伊等恭傳此旨。一一面加教導。訓飭遵行。經此次訓諭後。倘有違旨。仍不戴翎頂。在外閒行。或游蕩滋事者。一經拏獲。先將該管大臣等。曾否傳旨訓飭該員之處。究問。如該管大臣等。業經傳旨訓飭。止將該員照從前所降諭旨治罪。若該管大臣等。並未傳旨訓飭。不但將該員治罪。並將該管大臣一併治罪。決不寬貸。再隨圍之侍衛章京官員內。朕曾見有不戴翎頂。及露首坐食街市者。即使無力。不能攜帶火食。亦當在街

市買至下處食用。豈有身係職官。竟不戴翎頂坐食街市之理乎。著交總理行營王大臣等。通行曉諭。嗣後凡在行營隨往之侍衛章京官員等。儻仍有不戴翎頂。露首街市。游蕩喫飯者。該總理行營王大臣等。立即拘拏。指名參奏治罪。斷毋徇隱。○又

諭成都將軍慶成。此次陞見來京。朕於召對時。念及伊勦捕邪匪。曾經殺賊立功。身受兩傷。節經施恩優渥。因降旨詢問。曾否賞過雙眼花翎。緣事革去。據慶成奏。伊於乾隆五十三年。在副將任內。隨孫士毅出兵安南。曾經

賞給總兵銜。得有雙眼花翎。在任已經戴用。嗣奉諭來京。伊先見和珅。和珅告現已撤兵。不應戴用。伊是以不戴。屢蒙

召見。總未言及。又嘉慶二年。勦捕邪匪。拏獲賊首劉啟榮。解京時。

高宗純皇帝欲賞伊雙眼花翎。又經和珅奏止等語。及詢以此語聞自何人。又不能指出。因命軍機大臣傳旨詢問。伊隨征安南時。究因何事。

賞戴雙眼花翎。據稱因帶兵過富良江。直抵黎城。較衆出力。是以

賞給。並稱此次

恩旨。係孫士毅於具奏懇辭公爵及寶石頂戴摺內。仰蒙

硃筆批迴等語。經軍機大臣據以入奏。朕當覺其語涉荒唐。即慶桂等亦僉稱所言未必可信。隨命將從前辦理安南軍務時

諭旨檔案。並

硃批孫士毅具奏原摺。詳細檢查。本日據慶桂等奏稱。詳查

諭旨奏摺。俱無此事。朕親自恭閱。實無此

旨。奏摺內亦無此

殊批。因又命軍機大臣傳旨詰問。伊初猶託詞係由孫士毅在彼札知。其原札因日久無存。迨加以駁詢。始稱委緣希冀邀恩。信口誑奏。今既查明。自問實屬盲昧。懇求治罪等語。我

皇考所行大經大法。朕實不逮萬一。然亦非癡愚闇弱之主。慶成喪心病狂。任意面欺。殊出情理之外。雙眼花翎。逾格懋賞。非將佐偏裨所可倖邀。慶成隨征安南時。止係副將。因拏獲賊匪陳名炳。經孫士毅保奏。賞戴花翎。以應升之缺。升用。並未先給總兵升銜。焉能

遽邀曠典。如果曾經

賞戴雙眼花翎。伊回京時並未奏繳。彼時留京供職。游擢副都統侍郎。在乾清門侍衛上行走。豈有不蒙垂詢之理。況當日果有

特恩賞錫。豈和坤一語即能撤去。即如所言。慶成於拏獲劉啟榮時。業經用至大員。蒙

賞雙眼花翎。和坤尚行奏止。則伊在安南隨征時。止係副將。和坤豈有轉不奏止之理乎。是其前後所言。自相矛盾。理屈詞窮。更無可置喙矣。慶成前在軍營。曾獲罪譴。經朕棄瑕錄用。擢至成都將軍。職分優崇。乃

在朕前恣行欺罔。昧良辜恩。莫此為甚。伊前此帶兵時。於一切奏報打仗殺賊。其詭飾之處。不知凡幾。挾詐冒功。視為慣技。今於朕前。尚敢如此面欺。無所忌憚。竟係天奪其魄。使其虛誑之罪。自行敗露。實屬罪由自取。受譴更何所辭。慶成若非屢立戰功。且曾經受傷。應即拏交刑部。按欺罔律治罪。定擬上時。竟當即予正法。姑念慶成前在三省軍營。雖多粉飾。但既受傷。朕心究覺不忍。功疑惟重。姑從寬貫其一綫。慶成著革職。發往黑龍江效力贖罪。並著派乾清門侍衛格布舍阿那保。軍機章京福綿。押交兵部。令其即

日起身。其前日恩賞綉緞紗疋等件。均行追繳。朕念其勞。姑薄其罰。內外大小臣工。如有似此喪心欺罔者。必執法無赦。毋謂可以概邀寬典也。○又

諭。玉慶奏查出私賞土爾扈特和碩特通事頂戴。歷任喀喇沙爾辦事大臣一摺。朝廷名器。如有應行鼓勵人員。自應奏明賞給。烏爾圖納遜那清保麒麟保。私賞通事四名六品頂戴。甚屬非是。烏爾圖納遜那清保既已身故。麒麟保業經獲咎。俱免深究。著玉慶曉諭該通事等。以爾等頂戴。皆係前任大臣私行賞戴。並未奏明。今經查出。應即裁撤。大皇帝念爾等數年

來一切差使均屬奮勉。著加恩降一等。賞給七品頂戴。嗣後凡有當差奮勉。應賞頂戴者。該大臣等奏請先賞金頂。果能加倍奮勉。再行奏請賞給六品頂戴。不准私自賞給。○又

諭。本日據領侍衛內大臣等。參奏御前大臣丹巴多爾濟。因大學士朱珪召對之後。行至月華門。步履蹇滯。輒喚令南書房太監等用木橙昇出。大昧體制。請旨懲辦等語。所奏甚是。前此嘉慶五年。朱珪因彭元瑞在西華門內墜馬跌傷。不能行動。將轎喚入。令彭元瑞乘坐而出。經御史周棻參奏。將朱珪交部議處。彭

元瑞係跌傷昏悶之時。情有可原。交部察議。彼時彭元瑞乘轎處所。附近西華門。不過在紫禁城之內。距大內尚遠。即經御史叅奏懲處。今月華門地方。距乾清宮咫尺。丹巴多爾濟輒令用木橙將朱珪昇出。尤乖體制。在朱珪筋力衰頹。精神恍惚。當太監等昇出之際。伊亦全然不知情。稍可原。丹巴多爾濟是何居心。紊亂體制。伊非不知輕重者可比。除太監二人。重責發下賤當差外。丹巴多爾濟著交部嚴加議處。朱珪著交部議處。○十二年

諭。前經降旨。令官員等不得私去頂戴。於酒樓茶社。恣

為嬉游。原統滿官漢員。概為禁諭。近來八旗官員。皆改從前積習。惟漢員尚有私去頂戴。便服赴園觀劇。及挾優飲酒等事。實於官箴有玷。著再行申禁。以肅官方。如再有違犯者。即當嚴行叅辦。○又

諭。玉慶奏確查弁兵越級戴用官頂緣由一摺。據稱檢查新疆檔案。並部頒則例。回疆並無比照軍營弁兵加等戴頂之例。亦無從前賞給弁兵加等戴頂之案。止查有乾隆五十六年。德勒克札布任內起。以及歷任大臣。指放金頂隨營外委各堂印執照。至守備姜大凌。從前所用四品頂戴。係明興當堂分付。以回疆

有加等頂戴之舊規。與外委周廷弼一同受賞。並無勞績。亦無賄囑情事等語。官員頂戴名器攸關。豈容稍有僭越。聞新疆相沿陋習。文職部員及筆帖式等。頂戴俱僭越二級。營員備弁以下。頂戴俱僭越一級。以及兵弁書吏。皆有頂戴之事。並未見諸例文。當日曾否奏明。奉有

特諭。事隔多年。均無可考。此在新疆甫經平定之時。或因彈壓外藩。藉肅觀瞻。尚屬一時權宜。今新疆久隸版圖。與內地無異。中外大小官員。其品級皆有定制。豈可不明示等威。以彰畫一。乃歷任新疆辦事大臣。

均沿該處舊習。任聽官員弁兵人等僭用頂戴。實屬非是。著傳諭各路新疆辦事大臣。除將現在官員弁兵等所用越級頂戴革除外。此後不准再越級戴用。其未經年滿書吏亦毋許擅給頂戴。外委不得例外增添。違者著照違制例加倍懲處。再向來派往新疆守卡各員。因侍衛章京人少。往往即派拜唐阿前往。該拜唐阿到彼後。皆戴用藍翎侍衛頂戴。及年滿回京。仍將翎頂撤去。似此翎頂忽戴忽撤。亦不成事。且近於虛偽。非所以崇尚實政。嗣後新疆管卡各員。均著由侍衛章京派往。如侍衛等一時乏人。著即在拜

唐阿內擇其人才出色者。擬定正陪。帶領引見。挑補藍翎侍衛額缺。再行派往。至此事。明興德勒克札布二員。前於玉慶初次查奏到日。傳到軍機處詢問之時。據明興稱。守備姜大凌。外委周廷弼。均未給予越級頂戴。德勒克札布。亦稱事隔多年。不能記憶清楚等語。今據玉慶訊明。姜大凌。周廷弼。越級頂戴。係明興當堂分付。伊二人所供相同。而該處給發虛頂執照。起自乾隆五十六年。德勒克札布任內。明興德勒克札布。給予弁兵等。越級頂戴。猶係因循陋習。各尚可寬。惟於傳旨詢問之時。並不據實登答。伊二人皆

曾任大員。飾詞却過。不可不示以懲處。明興德勒克。札布。均著革去筆帖式。發往熱河。充當馬甲。交與慶傑嚴行管束差委。○十五年

諭。近來升擢各員。均於謝恩召對後。方換新銜頂戴。因思廢員內有本無頂戴。現在加恩錄用者。若於謝恩召對時不用頂戴。進內行走。殊於體制未協。嗣後如無頂戴之廢員。經朕擢用。著即用新銜頂戴。赴宮門謝恩。僮遇朕赴圍進宮。及傳膳辦事之日。俱於道旁碰頭後。再用頂戴。豫備召對。著為令。○十七年

諭。福克精阿奏西甯辦事大臣衙門主事筆帖式。請用

加二級頂戴。並請將通事頭目六名。准戴金頂一摺。所奏非是。從前新疆甫隸版圖。派往辦事章京。有暫用加級頂戴者。嗣因該處辦事大臣。有私給回目兵丁頂戴之事。改定章程。通飭不准私用加級頂戴。著為定例。至西甯尤屬內地。福克精阿甫歷外任。率請將該衙門主事筆帖式。賞用加級頂戴。此端一開。若各處皆紛紛瀆請。殊乖體制。福克精阿受人慫恿。妄意市恩。糊塗膽大。所請不准行。並著傳旨申飭。仍交部議處。至通事頭目六名。請賞戴金頂。亦屬過多。著准其於通事頭目中。擇其能事出力者。賞給金頂二

名。作為定額。遇缺揀補。以昭限制。○二十一年

諭。朕風聞鄂勒哲依圖索特納木多布齋二人近日坐轎。並見鄂勒哲依圖穿用皂靴。伊等均係蒙古。且現任御前大臣。領侍衛內大臣。亦屬武職。並無坐轎之例。從前拉旺多爾濟丹巴多爾濟坐轎。係特恩所賞。今鄂勒哲依圖索特納木多布齋未奉諭旨。即私行坐轎。且鄂勒哲依圖私穿皂靴。貪尚安逸。殊屬不合。著傳旨申飭。仍交理藩院議處。○二十三年

諭。朕恭閱

皇考高宗純皇帝實錄。內載乾隆五年六月

諭國家章服之制。所以辨等威。重名器。朕訪聞原任提督楊凱。原任總兵楊謙。俱係獲罪革職之員。今在揚州本籍。仍戴紅頂花翎。出入衙門。似此違越制度。不安本分。不可不加以懲儆。著將楊凱楊謙。交該督撫照例擬罪。並通行各省督撫。遇有革職人員。妄戴頂帽花翎藍翎者。據實題參等因。欽此。仰見我

皇考慎重名器至意。朕本欲再行宣示。以肅朝章。本日適正紅旗滿洲都統儀親王。參奏原任總管常海。係部議降調。應補護軍校之員。仍戴三品翎頂。請交刑部辦理。常海違制僭用翎頂。著交刑部照例治罪。朕

並聞近日降調大員內。有仍僭用原官頂戴者。著該管官隨時查察。如有似此違制僭越者。即行據實參奏。毋稍徇隱。○二十五年

諭。御史邱家燁奏請定迎送官員服色一摺。據稱本年正月初三日。各官詣午門前恭候跪送。或服蟒袍補褂。並有止服補褂。及常服挂朝珠者。至黎明時。始據禮部鴻臚寺令穿蟒袍者排班。餘皆撤退等語。禮部職司典禮。遇有迎送差使。自應將例穿服色。先行傳知各衙門。以免參差。此次殊屬疏略。嗣後鑿與出入。午門前迎送各官。是日應穿何章服。著禮部俱查明

定例。先期知照各衙門一體遵行。用昭畫一。○又

諭。今日據阿克當阿代慶郡王綿懋轉奏。伊府中有毗盧帽門口四座。太平缸五十四件。銅路鐙三十六對。皆非臣下應用之物。現在分別改造呈繳。國家設立制度。辨別等威。一名一器。不容稍有僭越。慶親王永璘府第。本為和珅舊宅。此等違制之物。皆係當日和珅私置。及永璘接住以後。不知奏明更改。相沿至二十年之久。設當永璘在日。查出亦有應得之咎。今伊子綿懋。甫經襲爵。即知據實呈報。所辦甚是。所有毗盧帽門口。該府業已自行拆改。其交出之太平缸銅

路鐙。著內務府大臣另行擇地安設。並通諭親王郡王貝勒貝子及各大臣等。會典內王公百官一應府第器具。俱有定則。以昭限制。如和坤之驕盈僭妄。必致身罹重罰。後嗣凌夷。各王公大臣等。均當引以為戒。凡卽第服物。務恪遵定憲。敬慎自持。寧失之。不可稍有僭踰。庶幾久膺爵祿。永保令名也。○又

諭。那彥寶奏。審訊已革教諭李訓控案。該革員仍戴頂帽。不服審問。當堂挺立。大肆咆哮。現將該革員除去頂帽。鎖鑄收禁等語。此案自上年八月。據程國仁叅奏。當即降旨將李訓革職。交該撫審辦。乃數月未經

審結已屬遲延。又不將該革員摘去頂戴。嚴行管押。任其公然戴頂。出入自由。此與未經革職者何異。是該革員之敢於當堂咆哮。不服審訊。皆程國仁因循軟弱。縱之使然。屬員既不畏上司。小民復不畏官長。壞法亂紀。端有由開。程國仁豈能復勝侍郎之任。著以六部郎中降補。以為大員不遵法度。市惠沽名者戒。○道光二年

諭。近來京外各官。遇有遷擢。皆於召見及接奉批摺後。始換升銜頂戴。本非舊制。嗣後京外升任人員。京官自奉有諭旨。外官自接到部文後。著即換用升銜頂

戴○四年

諭富綸奏前任辦事大臣私給布魯特等頂戴一摺。從前玉德巴哈布並未具奏。擅令布魯特額依穆爾伯克等戴用金頂。甚屬非是。玉德業經病故。無庸議外。巴哈布著交部議處。布魯特庫渠桂等。幫辦該部落事務尚好。今既多年。著加恩庫渠桂額依穆爾伯克庫納克拜。仍賞戴金頂。嗣後遇有此等事。必須奏明。候朕施恩。如再有私給頂戴者。一經查出。定行交部嚴加議處。○六年

諭四子部落王伊什楚克魯布。被控僭用黃緞等款。均

已供認。任性妄為。實屬溺職。著即革職。○八年

諭。前因七品以下人員。違例僭用素金帽頂。應嚴行禁止。諭令大學士九卿詳查妥議。茲據奏查明歷屆改定章程。至嘉慶五年議准後。分明詳備。實足以示區別。而辨等威。所有七品用素金頂。八品用陰文鏤花金頂。九品未入流用陽文鏤花金頂。及由進士舉人出身。除授八九品小京官教職者。仍用進士舉人頂戴。其由進士舉人出身。降補佐雜等官者。各照現任品級戴用。其大銜借補小秩者。各照本銜戴用。各條俱著照嘉慶五年原議。分別遵行。至舉人一項。應照

七品官例。戴素金頂。貢生一項。應照八品官例。用陰文。鏤花金頂。毋庸更用銀托。生員監生。仍戴用銀頂。武職八品以下頂戴。與文職同。俱著照所議畫一辦理。並著通諭內外各衙門。申明例禁。務當實力稽查。行之久遠。在京文職各員弁。責成該部院寺各堂官。及步軍統領。各將所屬隨時查察。毋得視為具文。外省文武。由吏兵二部。行文各該省將軍都統督撫提鎮。認真查辦。生監等責成國子監堂官。及直省學政。嚴切曉諭。俱著勒限半年。一體更換。如再有違例僭用者。一經發覺。即著照違制律。嚴行叅究。儻該管官

失於查察。意存容隱。著科道據實糾參。定將該管官一併交部議處。其有無職人員。妄用頂戴者。並著一律查禁。以肅功令。○又

諭。那彥成等奏。各城小回子戴用五六七品頂戴者甚多。並有戴用藍翎之人。查係領兵將領。隨時給予。並無奏明案據。請祇准其頂戴榮身。與小回子一體納糧當差等語。頂戴為名器所關。原不容稍滋冒濫。既據該督等查明。前此帶兵將領等。隨時給予。均無票據。若此時一律革除。其中有實在出力者。轉致向隅。著加恩將此項回子。祇准其頂戴榮身。凡未經奏明。

濫戴翎枝者。概令拔除。均著與小回子一律納糧當差。○又議准。官員應用朝服之日。不服朝服。不應服用之日。錯用朝服者。俱罰俸一月。○又議准。屬員謁見上司。擅用朝衣。該上司即令其謁見者。均罰俸六月。○十年議准。文職縣丞以下。武職千總以下。遇應穿蟒袍之日。有無力製備者。不必定行服用。○十二年議准。八旗現任官員。令該管大臣留心約束教導。如有私去翎頂。在外閒行。經該管大臣參奏者。降二級調用。僕另有游蕩滋事情節。革職究辦。○十三年議准。隨圍

之侍衛章京官員。如有不戴翎頂。坐食街市者。令總理行營王大臣叅奏治罪。○又議准。內外衙門未滿典吏。混戴頂帽。除將本人照律治罪外。若本管官未經查出。照失於查察例。罰俸一年。係有意故縱。照徇庇例。降三級調用。其地方官不能查出。亦罰俸一年。若已經查出。而瞻徇情面。不即舉報者。照徇情例。降二級調用。○十五年議准。內外已滿吏員。僭穿補服。如從九品未入流。用七八品補服之類。除將本人革去職銜外。地方官如徇情失察。悉照前例。分別議處。○十七年

諭。有人奏安徽省蕪湖關書吏僭用素金頂。即在本管官當面執事。相沿已久。習為固然。殊違定制等語。各衙門應役之人。並無頂戴。若如所奏。書吏紛紛僭用素金頂。實於體制有關。必當隨時禁革。著該撫嚴密查訪。如實有其人。一面懲辦。一面據實奏聞。○二十

年

諭。吳壽昌由運副告降通判後。仍用五品頂戴一節。訊係該省歷年告降改補人員。均於補缺後始行更換頂戴。相沿已久。殊於體制未協。嗣後告降人員。著於呈准咨部由該撫行司飭知後。即行更換頂戴。以昭

覈實。如有延不更換者。即著嚴行叅處。○同治四年諭。近來降調革職人員。往往因未奉拔去翎枝諭旨。託詞戴用。其另案開復各員。亦或恃無不准戴用原賞翎枝明文。輒圖蒙混。殊屬非是。嗣後因事降調之員。未奉旨拔去翎枝者。除一品至五品。仍准戴用外。大員降至六品以下。以及革職各員。一概不准戴用。其開復原官者。必須本案開復。或奉特旨賞還。及續有軍功。經大臣督撫奏請開復翎枝。方准照常戴用。儻因另案開復。或捐復原官。仍不准冒昧戴用。以昭體制。而杜傲幸。○光緒九年

諭。向來已革人員。例不准戴用頂戴。近有仍行戴用者。殊屬非是。嗣後官員因事降調。如曾經賞加頂戴。仍准戴用。至革職人員。概不准其戴用。其有棄瑕錄用。因案開復。及捐復者。均不准仍戴前賞頂戴。以肅體制。